

OFFERYNNAU STATUDOL CYMRU

**2015 rhif 1823 (Cy. 265)**

**PLANT A PHERSONAU IFANC, CYMRU**

**Rheoliadau Ymweliadau â Phlant dan Gadwad (Cymru) 2015**

<i>Gwnaed</i> - - - -	<i>21 Hydref 2015</i>
<i>Gosodwyd gerbron Cynulliad</i>	
<i>Cenedlaethol Cymru</i> - -	<i>23 Hydref 2015</i>
<i>Yn dod i rym</i> - -	<i>6 Ebrill 2016</i>

Mae Gweinidogion Cymru, drwy arfer y pwerau a roddir gan adrannau 97(1)(b) ac (c), (2) a (4) a 196(2) o Ddeddf Gwasanaethau Cymdeithasol a Llesiant (Cymru) 2014(1), yn gwneud y Rheoliadau a ganlyn(2):

**Enwi, cychwyn a chymhwyso**

1.—(1) Enw'r Rheoliadau hyn yw Rheoliadau Ymweliadau â Phlant dan Gadwad (Cymru) 2015 a deuant i rym ar 6 Ebrill 2016.

(2) Mae'r Rheoliadau hyn yn gymwys o ran Cymru.

**Dehongli**

2.—(1) Yn y Rheoliadau hyn—

ystyr “A” (“A”) yw plentyn—

- a fu'n derbyn gofal gan awdurdod lleol ond a beidiodd â derbyn gofal ganddo(3) o ganlyniad i'r amgylchiadau a ragnodir yn rheoliad 3, neu
- yn ddarostyngedig i reoliad 2(2), plentyn sy'n dod o fewn categori a bennir yn rheoliad 4; ystyr “awdurdod lleol cyfrifol” (“*responsible local authority*”) yw—
  - pan fo A yn dod o fewn rheoliad 3, yr awdurdod lleol a oedd yn gofalu am A yn union cyn rhoi A dan gadwad,
  - pan fo A yn dod o fewn rheoliad 4—
    - os yw A yn preswyllo fel arfer yng Nghymru, yr awdurdod lleol ar gyfer yr ardal y mae A yn preswyllo ynddi fel arfer, a

(1) 2014 dccc 4.

(2) Gweler adran 197(1) am y diffiniadau o “penodedig”, “a bennir” ac “a bennwyd” a “rheoliadau”.

(3) Ar gyfer ystyr plentyn sy'n “derbyn gofal” gan awdurdod lleol, gweler adran 197(2) o Ddeddf 2014; diffinnir “awdurdod lleol” ac “awdurdod lleol yn Lloegr” yn adran 197(1) o Ddeddf 2014.

- (ii) mewn unrhyw achos arall, yr awdurdod lleol ar gyfer yr ardal y lleolir ynddi'r sefydliad y mae A dan gadwad ynddo neu'r fangre y mae'n ofynnol bod A yn preswyllo ynddi;

ystyr "Deddf 1989" (*"the 1989 Act"*) yw Deddf Plant 1989(4);

ystyr "Deddf 2012" (*"the 2012 Act"*) yw Deddf Cymorth Cyfreithiol, Dedfrydu a Chosbi Troseddwy 2012(5);

ystyr "Deddf 2014" (*"the 2014 Act"*) yw Deddf Gwasanaethau Cymdeithasol a Llesiant (Cymru) 2014;

ystyr "diwrnod gwaith" (*"working day"*) yw diwrnod ac eithrio dydd Sadwrn, dydd Sul, Dydd Nadolig, dydd Gwener y Groglith neu ŵyl banc yn yr ystyr a roddir i "bank holiday" gan Ddeddf Bancio a Thrafodion Ariannol 1971(6);

ystyr "R" ("R") yw cynrychiolydd yr awdurdod cyfrifol, sy'n ymweld ag A yn unol â threfniadau a wneir gan yr awdurdod o dan adran 97 o Ddeddf 2014;

ystyr "rheolwr achos tîm troseddwy ifanc perthnasol" (*"relevant youth offending team case manager"*) yw'r person o fewn tîm troseddwy ifanc yr awdurdod lleol(7) sy'n rheoli achos A;

ystyr "sefydliad" (*"institution"*) yw llety cadw ieuencid(8) neu garchar(9);

mae i "tîm troseddwy ifanc" (*"youth offending team"*) yr ystyr a roddir yn adran 39(1) o Ddeddf Trosedd ac Anhrefn 1998.

(2) Nid yw'r Rheoliadau hyn yn gymwys i blentyn sydd—

(a) yng ngofal awdurdod lleol yng Nghymru(10);

(b) yng ngofal awdurdod lleol yn Lloegr(11);

(c) yn berson ifanc categori 2(12);

(d) yn blentyn perthnasol yn yr ystyr a roddir i "relevant child" at ddibenion adran 23A o Ddeddf 1989(13); neu

(e) yn blentyn a fu gynt yn derbyn gofal ac, ar ôl ei gollfarnu o drosedd gan lys, sydd dan gadwad mewn llety cadw ieuencid neu garchar neu sy'n preswyllo mewn mangre a gymeradwywyd, ac, yn union cyn ei gollfarnu, y darparwyd llety iddo gan awdurdod lleol yn Lloegr o dan adran 20 o Ddeddf 1989(14).

---

(4) 1989 p. 41.

(5) 2012 p. 10.

(6) 1971 p. 80.

(7) Mae dyletswydd ar awdurdod lleol o dan adran 39(1) o Ddeddf Trosedd ac Anhrefn 1998 (p. 37) i sefydlu un neu ragor o dimau troseddwy ifanc ar gyfer ei ardal.

(8) Diffinnir "llety cadw ieuencid" yn adran 188(1) o Ddeddf 2014.

(9) Diffinnir "carchar" yn adran 188(1) a 197(1) o Ddeddf 2014.

(10) *Gweler* adran 197(3) o Ddeddf 2014 sy'n darparu bod "cyfeiriad yn y Ddeddf hon at blentyn sydd yng ngofal awdurdod lleol yn gyfeiriad at blentyn sydd o dan ei ofal yn rhinwedd gorchymyn gofal (o fewn yr ystyr a roddir i "care order" gan Neddf Plant 1989)". Gwneir darpariaeth ar gyfer plant yn derbyn gofal sydd dan gadwad, neu y gwneir yn ofynnol eu bod yn preswyllo mewn mangre a gymeradwywyd, yn Rheoliadau Cynllunio Gofal, Lleoli ac Adolygu Achosion (Cymru) 2015 [O.S.2015/ 1818 (Cy. 261)].

(11) *Gweler* adran 105(1) o Ddeddf 1989, sy'n darparu bod unrhyw gyfeiriad at blentyn sydd "in the care of a local authority" yn gyfeiriad at blentyn sydd yng ngofal yr awdurdod yn rhinwedd "care order" a bod i "care order" yr ystyr a roddir gan adran 31(11) o Ddeddf 1989. Mae gan awdurdod lleol yn Lloegr ddyletswyddau mewn perthynas â phlant yn eu gofal sydd dan gadwad, yn rhinwedd Rheoliadau Cynllunio Gofal, Lleoli ac Adolygu Achosion (Lloegr) 2010 (O.S. 2010/959).

(12) Diffinnir "person ifanc categori 2" yn adran 104(2) o Ddeddf 2014. Mae gan yr awdurdod lleol cyfrifol ddyletswyddau mewn perthynas â pherson ifanc categori 2 sydd dan gadwad mewn carchar neu llety cadw ieuencid, neu y gwneir yn ofynnol ei fod yn preswyllo mewn mangre a gymeradwywyd, o dan Reoliadau Ymadawyr Gofal (Cymru) 2015 [O.S.2015/ 1820 (Cy. 262)].

(13) Mae adran 23A(2) o Ddeddf 1989 yn diffinio "relevant child" ac adran 23B o Ddeddf 1989 yn pennu swyddogaethau ychwanegol yr awdurdod lleol cyfrifol yn Lloegr mewn cysylltiad â phlant perthnasol o'r fath. Mae gan awdurdod lleol yn Lloegr ddyletswyddau tuag at blant perthnasol sydd dan gadwad yn rhinwedd Rheoliadau Ymadawyr Gofal (Lloegr) 2010 (O.S. 2010/2571).

(14) Mae gan yr awdurdod lleol cyfrifol yn Lloegr ddyletswyddau mewn perthynas â phlentyn o'r fath a fu gynt yn derbyn gofal, o dan Reoliadau Plant sy'n Derbyn Gofal dan Gadwad (Lloegr) 2010 (O.S. 2010/2797).

### Amgylchiadau a bennir at ddibenion adran 97(1)(b) o Ddeddf 2014

3. Yr amgylchiadau a ragnodir at ddibenion adran 97(1)(b) o Ddeddf 2014(15) yw bod plentyn, ar ôl ei gollfarnu o drosedd gan lys—

- (a) dan gadwad, yn unol â gorchymyn gan lys, mewn llety cadw ieuencid(16) neu mewn carchar(17), neu
- (b) yn preswyllo mewn mangre a gymeradwywyd(18).

### Categoriâu a bennir at ddibenion adran 97(1)(c) o Ddeddf 2014

4.—(1) Y categorïau a bennir at ddibenion adran 97(1)(c) o Ddeddf 2014 yw'r canlynol—

- (a) plentyn, sy'n preswyllo fel arfer(19) yng Nghymru, sydd, ar ôl ei gollfarnu o drosedd gan lys—
  - (i) dan gadwad mewn llety cadw ieuencid, neu mewn carchar, neu
  - (ii) yn preswyllo mewn mangre a gymeradwywyd; a
- (b) plentyn sydd, ar ôl ei gollfarnu o drosedd gan lys,—
  - (i) dan gadwad mewn llety cadw ieuencid neu mewn carchar yng Nghymru, neu
  - (ii) yn preswyllo mewn mangre a gymeradwywyd yng Nghymru.

(2) Nid yw paragraff (1) yn gymwys mewn perthynas â phlentyn sy'n dod o fewn disgrifiad a nodir yn is-baragraffau (a) i (e) o reoliad 2(2).

### Yr awdurdod lleol a bennir at ddibenion adran 97(2) o Ddeddf 2014

5.—(1) Mae paragraff (2) yn pennu, yn unol ag adran 97(2) o Ddeddf 2014, yr awdurdod lleol y mae'n rhaid iddo gyflawni'r dyletswyddau a osodir gan adran 97 o Ddeddf 2014 neu o dan y Rheoliadau hyn mewn perthynas â phlentyn sy'n dod o fewn categori a bennir yn rheoliad 4.

(2) Pan fo plentyn yn dod o fewn categori a bennir yn—

- (a) rheoliad 4(1)(a), yr awdurdod lleol y mae'r plentyn yn preswyllo fel arfer yn ei ardal(20);
- (b) rheoliad 4(1)(b), yr awdurdod lleol y lleolir ynddo'r llety cadw ieuencid, carchar neu fangre a gymeradwywyd.

(15) Mae adran 97(3) o Ddeddf 2014 yn gosod dyletswydd ar awdurdod lleol i sicrhau bod cynrychiolydd yr awdurdod yn ymweld â phlentyn y mae'r adran yn gymwys iddo, a threfnu bod cyngor priodol a chymorth arall ar gael i blentyn y mae'r adran yn gymwys iddo.

(16) Diffinnir "llety cadw ieuencid" yn adran 188(1) o Ddeddf 2014 fel—

- (a) cartref diogel i blant,
- (b) canolfan hyfforddi ddiogel,
- (c) sefydliad troseddwy'r ifanc,
- (d) llety sy'n cael ei ddarparu, ei gyfarparu a'i gynnal gan Weinidogion Cymru o dan adran 82(5) o Ddeddf Plant 1989 at y diben o gyfyngu ar ryddid plant,
- (e) llety, neu lety o ddisgrifiad, a bennir am y tro drwy orchymyn o dan adran 107(1)(e) o Ddeddf Pwerau Llysoedd Troseddol (Dedfrydu) 2000 (llety cadw ieuencid at ddibenion gorchymynion cadw a hyfforddi).

Ystyr "cartref diogel i blant" yw cartref plant a ddefnyddir at y diben o gyfyngu ar ryddid ac a gymeradwywyd at y diben hwnnw, y cofrestrwyd person cysylltiad ag ef o dan Ran 2 o Ddeddf Safonau Gofal 2000; mae i "canolfan hyfforddi ddiogel" yr ystyr a roddir i "secure training centre" yn adran 43(1)(d) o Ddeddf Carchardai 1952; ac mae i "sefydliad troseddwy'r ifanc" yr ystyr a roddir i "young offender institution" yn adran 43(1)(aa) o'r Ddeddf honno.

(17) Diffinnir "carchar" yn adrannau 188(1) a 197(1) o Ddeddf 2014 fel term sy'n meddu'r ystyr a roddir i "prison" yn Neddf Carchardai 1952 (p. 52) (gweler adran 53(1) o'r Ddeddf honno).

(18) Diffinnir "mangre a gymeradwywyd" yn adran 188(1) o Ddeddf 2014 fel term sy'n meddu'r ystyr a roddir i "approved premises" gan adran 13 o Ddeddf Rheoli Troseddwy'r 2007 (p. 21).

(19) Mae adran 194 ac adran 186(2) o Ddeddf 2014 yn gwneud darpariaeth ynghylch statws preswylfa arferol plentyn sydd dan gadwad mewn llety cadw ieuencid neu garchar, neu sy'n preswyllo mewn mangre a gymeradwywyd.

(20) Mae adran 194 ac adran 186(2) o Ddeddf 2014 yn gwneud darpariaeth ynghylch statws preswylfa arferol plentyn sydd dan gadwad mewn llety cadw ieuencid neu garchar, neu sy'n preswyllo mewn mangre a gymeradwywyd.

### Amllder ymweliadau

- 6.—(1) Rhaid i'r awdurdod lleol cyfrifol sicrhau bod R yn ymweld ag A—
- (a) o fewn 10 diwrnod gwaith ar ôl rhoi A dan gadwad gyntaf, i'r graddau y mae hynny'n rhesymol ymarferol; a
  - (b) wedi hynny pa bryd bynnag y gofynnir yn rhesymol iddo ymweld gan—
    - (i) A,
    - (ii) aelod o staff y sefydliad y mae A dan gadwad ynddo, neu'r fangre a gymeradwywyd lle mae A yn preswyllo,
    - (iii) unrhyw riant A, neu unrhyw berson arall sydd â chyfrifoldeb rhiant am A, neu
    - (iv) y rheolwr achos tîm troseddwy'r ifanc perthnasol.
- (2) Caiff yr awdurdod lleol cyfrifol drefnu i R wneud ymweliadau ychwanegol ag A, gan roi sylw i unrhyw argymhelliad a wneir gan R yn unol â rheoliad 8(1)(b).

### Cynnal yr ymweliadau

7. Yn ystod pob ymweliad, rhaid i R siarad gydag A yn breifat oni bai—
- (a) bod A yn gwrthod, ac yntau mewn oedran digonol a chyda dealltwriaeth ddigonol i wneud hynny,
  - (b) bod R o'r farn y byddai gwneud hynny'n amhriodol, o ystyried oedran a dealltwriaeth A, neu
  - (c) bod R yn analluog i wneud hynny.

### Adroddiadau am ymweliadau

- 8.—(1) Rhaid i R ddarparu adroddiad ysgrifenedig am bob ymweliad, a rhaid i'r adroddiad gynnwys—
- (a) asesiad R, ar ôl ystyried safbwyntiau, dymuniadau a theimladau A, ynglŷn ag a yw llesiant A yn cael ei ddiogelu a'i hyrwyddo'n ddigonol tra bo dan gadwad neu'n preswyllo mewn mangre a gymeradwywyd,
  - (b) argymhellion R ynglŷn ag amseriad ac amllder unrhyw ymweliadau pellach gan R,
  - (c) unrhyw drefniadau eraill y tybia R y dylid eu gwneud er mwyn hyrwyddo cyswllt rhwng A a theulu A, neu er mwyn diogelu a hyrwyddo llesiant A,
  - (d) asesiad R o'r modd y dylai llesiant A gael ei ddiogelu a'i hyrwyddo'n ddigonol ar ôl ei ryddhau o gadwad, neu ddiddymu'r gofyniad i breswyllo mewn mangre a gymeradwywyd, sef yn benodol—
    - (i) a fydd angen i'r awdurdod lleol cyfrifol, awdurdod lleol arall, neu awdurdod lleol yn Lloegr ddarparu llety i A, a
    - (ii) a ddylai unrhyw wasanaethau eraill gael eu darparu, gan yr awdurdod lleol cyfrifol neu awdurdod lleol arall wrth arfer eu dyletswyddau o dan Ddeddf 2014 neu Ddeddf 1989, neu gan awdurdod lleol yn Lloegr o dan Ddeddf 1989.
- (2) Rhaid i R, wrth wneud unrhyw asesiad o dan baragraff (1), ac eithrio pan nad yw'n rhesymol ymarferol gwneud hynny, neu pan nad yw gwneud hynny yn gyson â llesiant A, gymryd i ystyriaeth safbwyntiau—
- (a) unrhyw riant A, neu unrhyw berson arall sydd â chyfrifoldeb rhiant am A, a
  - (b) aelodau priodol o staff y sefydliad y mae A dan gadwad ynddo, neu o staff y fangre a gymeradwywyd y mae A yn preswyllo ynddi.

- (3) Rhaid i'r awdurdod lleol cyfrifol roi copi o'r adroddiad i—
- (a) A, oni fyddai'n amhriodol gwneud hynny,
  - (b) person sy'n dod o fewn paragraff (2)(a), ac eithrio pan na fyddai gwneud hynny er budd pennaf A,
  - (c) llywodraethwr, cyfarwyddwr neu reolwr cofrestredig(21) y sefydliad lle mae A dan gadwad neu'r person sy'n gyfrifol am y fangre a gymeradwywyd y mae A yn preswyllo ynddi,
  - (d) y rheolwr achos tîm troseddwy'r ifanc perthnasol,
  - (e) os yw'n wahanol i'r awdurdod lleol cyfrifol, awdurdod lleol yr ardal y mae A dan gadwad ynddi, ac
  - (f) unrhyw berson arall y tybia'r awdurdod lleol cyfrifol y dylid rhoi copi o'r adroddiad iddo, o ystyried asesiad R.

### Cyngor a chymorth arall

9. Wrth wneud trefniadau yn unol ag adran 97(3)(b) o Ddeddf 2014 ar gyfer rhoi cyngor priodol a chymorth arall ar gael i A, rhaid i'r awdurdod lleol cyfrifol sicrhau—

- (a) bod y trefniadau—
  - (i) yn briodol, o ystyried oedran a dealltwriaeth A, a
  - (ii) yn rhoi ystyriaeth ddyladwy i argyhoeddiad crefyddol, tarddiad hiliol, cefndir diwylliannol ac ieithyddol A ac unrhyw anabledd sydd gan A(22), a
- (b) i'r graddau y bo'n rhesymol ymarferol, o ystyried oedran a dealltwriaeth A, fod A yn gwybod sut i ofyn am gyngor priodol a chymorth arall gan yr awdurdod cyfrifol

21 Hydref 2015

*Mark Drakeford*  
Y Gweinidog Iechyd a Gwasanaethau  
Cymdeithasol, un o Weinidogion Cymru

---

(21) Hynny yw, person a gofrestrwyd o dan Ran 2 o Ddeddf Safonau Gofal 2000 fel rheolwr cartref diogel i blant.

(22) Diffinnir "anabledd" yn adran 3(5) o Ddeddf 2014.

## NODYN ESBONIADOL

*(Nid yw'r nodyn hwn yn rhan o'r Rheoliadau)*

Mae'r Rheoliadau hyn yn gwneud darpariaeth ynghylch gofynion ymweld ar gyfer plant penodedig sydd, ar ôl eu collfarnu o drosedd gan lys, dan gadwad mewn llety cadw ieuencid neu garchar, neu y gwneir yn ofynnol eu bod yn preswyllo mewn mangre a gymeradwywyd.

Mae rheoliad 3 yn pennu'r amgylchiadau, at ddibenion adran 97(1)(b) o Ddeddf Gwasanaethau Cymdeithasol a Llesiant (Cymru) 2014 ("Deddf 2014"), sy'n peri bod plentyn yn peidio â derbyn gofal gan awdurdod lleol (digwyddiad a fydd yn dod â phlant o'r fath wedyn o fewn cwmpas y ddyletswydd a nodir yn adran 97(3) o Ddeddf 2014 a'r Rheoliadau hyn).

Mae adran 97(3) o Ddeddf 2014 yn gosod dyletswydd ar yr awdurdod lleol cyfrifol i ymweld â phlentyn o'r fath, cynnal cyswllt â'r plentyn, a darparu cyngor a chymorth arall iddo.

Yr amgylchiadau a bennir gan reoliad 3 yw bod plentyn, a fu'n derbyn gofal gan awdurdod lleol, ond a beidiodd â derbyn gofal oherwydd naill ai bod y plentyn, ar ôl ei gollfarnu o drosedd gan lys, dan gadwad mewn llety cadw ieuencid neu garchar, neu y gwnaed yn ofynnol fod y plentyn yn preswyllo mewn mangre a gymeradwywyd.

Bydd plant sydd, ar ôl eu collfarnu o drosedd gan lys, yn colli eu statws fel plant sy'n derbyn gofal o ganlyniad i'w rhoi dan gadwad neu ei gwneud yn ofynnol eu bod yn preswyllo mewn mangre a gymeradwywyd, yn dod o fewn disgrifiad a nodir ym mharagraff (a) neu (b) isod—

- (a) plentyn a oedd, yn union cyn ei roi dan gadwad, yn derbyn gofal yn rhinwedd darparu llety iddo gan yr awdurdod lleol o dan adran 76 o Ddeddf 2014; neu
- (b) plentyn sy'n preswyllo fel arfer yng Nghymru ac a drinnid fel plentyn yn derbyn gofal yn unol ag adran 104 o Ddeddf Cymorth Cyfreithiol, Dedfrydu a Chosbi Troseddwy'r 2012 ("Deddf 2012") (yn rhinwedd ei roi ar remand i lety awdurdod lleol neu lety cadw ieuencid yn unol ag adran 92 o Ddeddf 2012).

Mae rheoliad 4 yn pennu, at ddibenion adran 97(1)(c) o Ddeddf 2014, dau categori o blant (a bennir yn unol ag adran 97(2)), y bydd gan awdurdod lleol ddyletswyddau mewn cysylltiad â hwy o dan adran 97(3) o Ddeddf 2014 ac o dan y Rheoliadau hyn. Mae cymhwysio rheoliad 4 yn ddarostyngedig i eithriadau, a nodir yn rheoliad 2(2).

Bydd y plant a eithrir o'r categorïau a bennir yn rheoliad 4 oherwydd eu bod yn dod o fewn disgrifiad a nodir yn is-baragraffau (a) i (e) o reoliad 2(2) yn cael ymweliadau a chymorth gan yr awdurdod lleol (neu awdurdod lleol yn Lloegr) sy'n gyfrifol am ddiwallu eu hanghenion yn unol â gofynion statudol eraill.

Yn ddarostyngedig i'r ddarpariaeth a wneir gan reoliad 2(2), bydd y categorïau o blant a bennir yn rheoliad 4 yn dod o fewn disgrifiad a nodir ym mharagraff (a) neu (b) isod—

- (a) y categori cyntaf yw plentyn sy'n preswyllo fel arfer yng Nghymru ac, ar ôl ei gollfarnu o drosedd gan lys, a roddwyd dan gadwad mewn llety cadw ieuencid neu garchar, neu y gwneir yn ofynnol ei fod yn preswyllo mewn mangre a gymeradwywyd,
- (b) yr ail categori yw plentyn sydd, ar ôl ei gollfarnu o drosedd gan lys, dan gadwad mewn llety cadw ieuencid neu garchar, neu y gwneir yn ofynnol ei fod yn preswyllo mewn mangre a gymeradwywyd a leolir yng Nghymru.

Mae rheoliad 5 yn pennu, at ddibenion adran 97(2) o Ddeddf 2014, pa awdurdod lleol y mae'n rhaid iddo gyflawni'r dyletswyddau a osodir o dan adran 97 ac o dan y Rheoliadau hyn mewn perthynas â phlentyn sy'n dod o fewn categori a bennir yn rheoliad 4.

Mae rheoliad 6 yn gwneud darpariaeth ynglŷn ag amlder yr ymweliadau; rhaid i'r awdurdod lleol cyfrifol drefnu i'w gynrychiolydd ymweld â'r plentyn o fewn 10 diwrnod gwaith ar ôl rhoi'r plentyn dan gadwad, neu ei gwneud yn ofynnol gyntaf ei fod yn preswyllo mewn mangre a gymeradwywyd, ac wedyn pa bryd bynnag y gofynnir yn rhesymol iddo wneud hynny gan bersonau penodedig, er enghraifft, y plentyn, rhieni'r plentyn, neu'n unol ag argymhellion a wneir gan y cynrychiolydd.

Mae rheoliad 7 yn darparu bod rhaid i'r cynrychiolydd, yn ystod pob ymweliad, siarad yn breifat gyda'r plentyn, oni fydd yn amhriodol gwneud hynny neu fod y plentyn yn gwrthod gwneud hynny.

Mae rheoliad 8 yn gosod dyletswydd ar y cynrychiolydd i ddarparu adroddiad am bob ymweliad, ac yn pennu'r hyn y mae'n rhaid ei gynnwys yn yr adroddiad hwnnw. Mae'n darparu hefyd fod rhaid rhoi copi o'r adroddiad i'r plentyn, oni fyddai'n amhriodol gwneud hynny, ac i bersonau penodol eraill.

Mae rheoliad 9 yn gwneud darpariaeth mewn perthynas â dyletswydd yr awdurdod lleol cyfrifol o dan adran 97(3)(b) o Ddeddf 2014 i drefnu bod cyngor a chymorth ar gael i'r plentyn.

Ystyriwyd Cod Ymarfer Gweinidogion Cymru ar gynnal Asesiadau Effaith Rheoleiddiol mewn perthynas â'r Rheoliadau hyn. O ganlyniad, lluniwyd asesiad effaith rheoleiddiol o'r costau a'r manteision sy'n debygol o ddeillio o gydymffurfio â'r Rheoliadau hyn. Gellir cael copi oddi wrth yr Adran Iechyd a Gwasanaethau Cymdeithasol, Llywodraeth Cymru, Parc Cathays, Caerdydd, CF10 3NQ.